

Date – 23/06/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Chief Minister Pu Lalduhoma kaihhruai Mizoram Resource Mobilization Committee (MRMC) vawiina thukhawm chuan inrenchem zawnga sorkar kal dan tur hrang hrang an rel.
2. MZP-in Mizoram-a Special Intensive Revision tih mekah Chakma khua bika vote pung nasa lutuk chu ennawn tha leh turin Chief Electoral Officer an ngen.
3. Government Aizawl College Building chu Mizoram Presbyterian Church, SYNOD hnenah vawiin khan sorkarin a hlan.
4. President Droupadi Murmu-i chaun zanin hian Rashtrapati Bhavan-ah Padma Award hrang hrang a sem.

<><><>

MRMC

Mizoram Resource Mobilization Committee (MRMC) vawiina thukhawmin, Mizoramin ama puala High Court a neih theih dan tur te, Mizoram Police officer te'n orderly an kawl mi 118 vel tihlem leh Mizoram sawrkar hnuaia thawk doctorten an lak mek Non-Practicing Allowance (NPA) chungchang te ngaihtuah a ni.

Vawiin khan MRMC Chairman, Chief Minister Pu Lalduhoma hova Chief Minister's Conference Hall-a thukhawm chuan Mizoramin ama puala High Court a neih theih dan tur an sawiho a, MRMC Sub Committee on Administrative Reforms chuan nikum May ni 27 khan a hranga High Court neih a lo rawt tawh a. Hei hi Mizoram Peace Accord 1986 bawhzuina a ni telin, Law & Judicial Department hotute nen sawiho a ni tawh a. High Court dinna tur hmun hma a tha a, sawrkar sum senso a tlem phah dawn bakah Mizoram mipuiin an dikna chanvo awlsam zawka an chan theihna tura kawng sialna a ni.

Meeting hian DC Office tihchakna atan District tina District Rural Development Office (DRDO) te hi DC Office-a Planning & Development Wing anga zawi zawia lehlin a tul nia ngaih a ni a. Hei bakah hian District tina Deputy Commissioner Office te manpower tihchak an ngaih avangin sorkar inrenchemna hre

reng chungin tuam chak dan tur chu MRMC, Administrative Reforms Sub-Committee ngaihtuah tura tih a ni bawk a. Mizoram sawrkar hnuaia thawk doctorten an lak mek Non-Practicing Allowance (NPA) pawh ngaihtuah nawn leh a ni a. Doctor ten NPA hi dik taka an lak theih nan ‘Monitoring System’ changtlung tak siam an rawt a. Mipuiten sawrkar atanga service an dawn “Right to Public Services Act, 2015” hnuaia Service 197 tarlante chu a hun taka a hmangtu mipuiten an hman theih nan tun aia tha zawka vil ni se, an ti. Zuangtui Industrial Estate chhunga Industrial plot dawngtuten a nihna ang taka an hman theih dan tur te, Balu leh Lung atanga chhiah lak belh theihna te, sawrkar inrelbawl dan tha zawk neih dan tur leh sum inrenchemna lam thil eng emaw zat an sawi bawk.

He hunah hian Vice Chairman Pu Haukhuma Hauzel, IAS (Rtd), Minister – Pi Lalrinpuui, Pu F. Rodingliana, Pu B. Lalchhanzova leh MRMC member te an tel a ni.

<><><>

CADC

Chakma Autonomous Dist Council ah sorkarna siam tura thawk dun turin BJP leh ZPM chu an inrem a, Leader-a an thlan thar Pu Nirupam Chakma an Mizoram Governor hnenah sorkarna an siam theih thu a thlen a ni.

Vawiin khan CADC CEM hlui Pu Durjya Dhan Chakma leh CADC District BJP President kaihhruiin Chakma Democratic Alliance Legislature Party din a ni a, Chakma Democratic Alliance Legislature Party ah hian Leader: Pu Nirupam Chakma, Deputy Leader: Pu Kali Kumar Tongchangya (ZPM), Treasurer: Pu Molin Kumar Chakma (BJP) leh Secretary: Pu Supreme Raj Chakma (ZPM) te an awm a ni.

Legislature Party thar din chuan Pu Nirupam Chakma, tuna Kamalanagar Constituency atanga MDC ni mek chu Executive Committee dinna atan sawrkar siam theihna claim siam turin thuneihna a pe a ni a.

Tuna dinhmunah CADC ah hian BJP in MDC 10 a nei a, ZPM hian MDC 9 a nei bawk. Chakma Democratic Alliance ah hian MDC 19 an awm a, Opposition lamah hian MDC pakhat chauh, Pu Rasik Mohan Chakma, MLA a awm thung a ni.

<><><>

MZP

Mizo Zirlai Pawl (MZP)-in Mizoram-a Special Intensive Revision tih mekah kum 2005 E-Roll leh roll thar ber- kum 2024 E-Roll khaikhinin Chakma khua bikah vote percent punna sang lutuk chu ennawn tha leh turin Chief Electoral Officer an ngen.

MZP President Dr C. Lalremruata chuan vawiin khan Aizawl Press club-ah thuthar thehdarhtute kawmin, MZP chuan Mizoram-ah Special Intensive Revision (SIR) dik leh felfai taka kalpui a nih theihna turin tun hma atanga a ram mi ten ram dang mi pun chakna thin Assembly Constituency-a khaw hrang hrang a enfiah a ti a. Hetah hian SIR-in a behchhan kum 2005 E-Roll leh roll thar ber- kum 2024 E-Roll an khaikhin a, Chakma khua bikah vote percent punna sang lutuk leh 2005 E-Roll a khaw awm lo, a hnu a khaw 97 awm tharte leh India leh Bangladesh khua leh tui nihna nei kawp mi engemawzat bakah E-Roll a House number awm lo pawh hmuh

chhuah a nih thu a sawi a. Hemi chungchangah hian, Chief Electoral Officer (CEO) hnehah complaint thehluh a nih tur thu sawiin, Complaint a tarlan khaw 195 te chu Special Intensive Revision (SIR) kalpui mekah en uluk leh zual tur leh SIR kalpui a nih tawh pawhin, DEO te nen ennawn leh turin a ngen a, he hmalaknaah hian a tul anga thuneitute thawhpui an inhuam reng thu MZP chuan a sawi bawk a ni.

Byte: MZP President

MZP President chuan, Election Commission of India in Special Intensive Revision (SIR) a kalpui mekah Mizoram State chhunga thawktu Chief Electoral Officer (CEO) leh a thawhpuite chu India khua leh tui dik takte humhimna SIR an kalpui naah dan ang taka hmala turin a ngen nawn leh a. Tun hma atanga Chakma Foreigner te avanga Mizoram khua leh tui dik tak tena harsatna an tawk fo thin chu hriathiam har an tih thu sawiin, SIR kaltlanga dan lo anga Electoral Roll a awm zawng zawngte chu paih vek turin Chief Electoral Officer (CEO), Mizoram leh a hnuaia hnathawkte a ngen a. Booth Level Officer (BLO) te pawh rinawm leh dik taka thawk tur leh khua leh tui nilo te chu paih ngam turin a ngen nghal bawk.

MZP-in kum 2005 atanga kum 2024 inkara khaw 10-a vote pun chhoh dan a tarlan danin, Sumasumy khuaah vote pung nasa berin, zaa 334.61-in a pung a, Gerasury-in dawtin vote zaa 260.71-in a pung a, Damzautlang chu pathumna niin, vote zaa 225.53-in a pung a ni.



GAC

Aizawla Government Aizawl College Building chu Mizoram Presbyterian Church, SYNOD hnenah vawiin khan Higher & Technical Education Minister Dr. Vanlalhlana kaihhraina hnuaiah hlan a ni.

He hun hi Planning & Programme Implementation Department Committee Room-ah neih niin, Mizoram sorkar aiawhin Higher & Technical Education Department Secretary Dr. Lalrozama leh Mizoram Synod moderator Rev John Raldosanga ten inremna thuthlung an ziak a ni. Inremnaah hian Mizoram Synod chuan building hlut zawng (depreciated value), sawrkar dan ding lai anga chhut chhuah sa cheng vbc 3, nuai 18, sing 9, 2,300 chu Mizoram sawrkar H&TE Department ah chhung lutin, pawisa a chhun luh ni atang hian Government Aizawl College Building, Sikulpuikawn ami neitu nihna chu Mizoram Presbyterian Church kutah a awm nghal dawn a. Hei bakah hian hemi Building luah tute awm zui zel dan tur chungchang pawh felfai takin inremna lehkha ah hian ziah a ni bawk.

Higher & Technical Education Minister Dr. Vanlalhlana chuan Aizawl College Building chu zirna lam ngaihven, mi rintlak tak te kuta a awm tur chu ngaihthat thlak a tih thu a sawi a. Mizoram synod-in a hlauh ber chu Finance department in an kawl bo mai ang tih a ni a ti a. Finance dept. enkawltu Chief Minister Pu Lalduhoma chuan hemi chungchangah hian hlauhthawn tur a awm lova, a hmanna tur an neih hunah a rang thei ang berin a pek chhuah tur thu tukin khan a hriih tih a sawi a ni.

VC

Aizawl College hi kum 1975 August ni 25, khan din a ni a, Building nei mumal loin hmun hrang hrangah class neih a nih hnuaah Sikulpuikawna Sikulpui leh Sikulsen-te chu Sorkar kuta a awm lain a compound-ah Govt. Aizawl College

building sak a ni a. Kum 2010 Synod Inkhawmpui agenda General 33-in a rel anga Sikulsen (Govt. Boys' Primary School) leh Sikulpui (Govt. Boys' Middle School) te sorkar kut atanga la let leh tura hmalakna kalzelah kum 2019 May ni 29 khan Sorkar chuan Mizoram Synod kutah a hlan let a. Kum 2018 February ni 26, khan Mualpui-ah Govt. Aizawl College campus thar tur chu khatih hunlaia Chief Minister Pu Lal Thanhawla'n a hawng a. Tunah hian a tam zawk insawn tawh mahse Sikulpuikawna college building-ah hian MA leh BA 1st Year classroom bakah room engemaw zat an la luah a. He building hi Mizoram Synod chuan kum 2024 December ni 10 khan zirna leh a kaihhnawih hrang hrang atana hman tangkai a nih theih nan Sorkarah lehkha a thehlut a. Aizawl College building chhuahsan dan tur hi GAD kaihhruaiin H&TE Dept. leh PWD te nen ngaihtuah niin, draft committee din a ni a. Draft agreement (final draft) hi chu kumin March ni 23, khan peih niin Mizoram sorkar chuan Mizoram synod kutah a hlan ta a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

SVANNIDHI MAHOTSAV

UD&PA Department buatsaih 'SVANidhi Mahotsav' –Kawngkama thil zuarte puala kut chu Aizawl Dawrpui Multipurpose Centre-a vawiin khan buatsaih a ni a, AMC Mayor Pu H. Lalremtluanga'n a hmanpui.

Pu H. Lalremtluanga chuan AMC sawkar thar hnuaiah vendor te leh vending zone zirchiang turin study team an in din thu te, vending registration pek chhuah chungchangah hmasawna tur an ngaihtuah mek thu te, thutna hmun sawn te leh thutna hmun tur neilo te chungchangah pawh ngaihtuahna an sen mek thu a sawi a, thutna awm sa chei that kawngah leh mipuite tana dawr nuam theih tur zawka siam kawngah hma lak zel an tum thu a sawi a Sawrkar laipuiin Solid Waste Management Rules 2026 a ti chhuak tharin bawlhhlawh paih leh sawngbawl kawngah tun aia tha leh uluk zawka hma lak an tum thu a sawi a , khawlaia thil zuarte chu beidawng lova rim taka thawk a, mahni awmna hmun ngai renga awm mai lova hma sawn tum zel turin a fuih bawk a ni.

VC

SVANidhi Mahotsav' ah hian PM SVANidhi credit card sem a ni a, loan wawi hnihna thleng rul zo tawhte tan dil theih a ni a, he kutah vek hian PM SVANidhi scheme kal tlanga loan rul tha leh digital payment ti tam zual mi 5 te hnenah lawmman certificate leh sum fai hlan an ni bawk.

PM-SVANidhi Scheme hi kawng kama eizawng ten an eizawnaa hmasawna an neih theihna tura scheme duan niin, Kum 2020, June ni 1 ah sawrkar laipuiin a tlangzarh a, Ministry of Housing & Urban Affairs leh Ministry of Department of Financial Services te chu Nodal niin, Mizoram ah chuan UD&PA Dept chu Nodal Department a ni.



PADMA AWARD

President Droupadi Murmu-i chaun zanin hian Rashtrapati Bhavan-ah Padma Award hrang hrang a sem. Padma Award te hi ramchunga civil mi chawimawina dawn theih sang ber a ni a. Zanin hi award sem thawh hnihna niin award 65 semchhuah ani dawn a. Kuminah hian a vaiin award 131 sem tura puan a ni a. Heng zingah hian Padma Vibhushan panga, Padma Bhushan 13 leh Padma Shri 13 sem tura puan a ni a. Vawiina award dawng tur langsar zingah Tennis khelthiam Vijay Amritraj, actor Mammooty, playback singer Alka Tagnik leh Cricketer Rohit Sharma te an tel a ni.

